

關愛的故事



不一樣的十七歲

我叫做威仔，喺我十七歲嗰年，即係兩年前，我同一大班朋友去泳池游水，點知一跳落去，撞到泳池底部，傷到頸骨第四至第六節，差啲令我生命畫上句號。我喺深切治療部住咗一個月，先至喺「鬼門關」走返出嚟，跟住喺骨科接受兩個月嘅治療，再喺醫院進行一連串嘅肌肉訓練。

喺呢段日子裡面，我嘅起居飲食，由起床、刷牙梳洗，以至早午晚餐，一切需要護士協助，嗰種事事要靠人嚟幫助嘅無奈感覺，令我覺得自己好無用，真係好難受。

好在喺呢個時候，我認識到一班過來人，佢地成日嚟醫院探望病友，仲鼓勵我要重新振作，努力嘗試擁有自己嘅新生活，仲帶我探訪過唔同會員嘅居所，參加輪椅朋友嘅生日會，同佢地一齊慶祝，俾我見到殘疾人士，一樣可以生活得好好，我覺得好開心，而且仲增加咗唔少嘅信心。

於是，我的起心肝，籌備離開醫院嘅事項，包括申請房屋、購買復康器材，預備照顧者接受訓練等，我仲開始積極做運動，提升雙手嘅活動能力。而家，我已經可以使用電動輪椅，經常同幾位輪椅朋友到醫院附近嘅商場行街，到茶樓傾偈，可以周圍去，真係好開心！

上年年初，我申請到公屋，經過治療師同朋友嘅協助，我間屋進行改裝，喺年頭交收，無幾耐我就可以正式離開醫院，重新投入社區生活。

受傷之後，令我學識更加珍惜同家人嘅相處，我好感激佢地對我不離不棄，一直為我勞碌奔波，亦多謝好多朋友嘅關心同愛護，佢地嘅鼓勵，就係我勇敢面對生活嘅原動力，雖然遇到唔如意嘅事，都永不放棄。

(590 字)